

豫章叢書

第二三冊

豫

章

集

書

卷之四

日涉園集

己未仲夏刊

於南昌退廬

欽定四庫全書總目卷一百五十五

集部

別集類

日涉園集十卷

永樂大典本

宋李彭撰彭字商老南康軍建昌人陳振孫書

錄解題以爲公擇之從孫王明清揮塵錄謂李

定仲求以不得預蘇舜欽賽神會興大獄彭卽

其孫也二說未知孰是宋史不爲立傳其行履

亦不可考趙彥衛雲麓漫鈔載呂居仁江西詩

派圖錄自黃庭堅以下二十五人彭名在第十

五居韓駒之亞則彭本文章之士故事蹟不見

於史也其集書錄解題作十卷世久無傳今檢

永樂大典所載彭詩頗多鈔撮編次共得七百
二十餘首諸體咸備謹校定譌謬仍釐爲十卷
以還其舊集中所與酬倡者如蘇軾張耒劉義
仲等皆一代勝流故其詩具有軟度無南宋人
麤獷之態呂居仁稱其詩文富贍宏博非後生
容易可到劉克莊後村詩話亦稱其博覽強記
而獨惜其詩體拘狹少變化今觀所作克莊所
論爲近之然邊幅未宏而錘鍊精研時多警策
頗見磨淬之功在江西派中與謝逸洪朋諸人
足相頡頏終非江湖末派所能及也

日涉園集目錄

卷一

五言古詩五十二首

卷二

五言古詩四十二首

卷三

五言古詩五十五首

卷四

五言古詩五十六首

卷五

七言古詩三十三首

卷六

七言古詩四十首

卷七

五言律詩五十八首

五言長律一首

卷八

七言律詩九十七首

七言長律一首

卷九

五言絕句二十一首

六言絕句六首

七言絕句九十五首

卷十

七言絕句一百一十首

補遺八首

日涉園集卷一

宋 李彭 撰

五言古詩

次正平上座韻贈子充

吾宗大宛種未入十二閑
膺門沫流赭氣已無燕山
何時黃金羈鞍轡長楸間
皎皎自空谷待君當御還
戲贈兼簡李翹叟

荊州有醉客踏雪至我廬
缺月寒皎皎掛在東南隅
索我五字句慙非競病徒
賣菜欲求益故態發狂奴
寄聲李夫人聊爲一笑娛

贈子充

阿充克家才昭代真孝秀白髮在板輿色養侍昏晝
來營甘脆具底事成宿留到骨似我窮黃鍾滿君脰
落帆哉生魄步屨月成穀幽園語更僕莫遣雙眉皺
覓句洗愁兵河傾轉箕斗

贈無著

蕭蕭玉澗翁韻調實瓌朗懷人修文去音塵生逸想
豈唯招重客我廬亦時枉微軫發妙言幽園復清曠
縹思下巖隈歲月駛雨槩寒蟬久停號新禽哢佳響
去者念履綦方來警蕙帳伊子厭囂塵絕壑期自放

從君割半峯披雲同矯掌

送人遊吳

朔風號木末迫此歲時晏驅車不停軌客子老昏宦
平生蔣詡徑求羊每娛玩持觴送落日抵掌河宿爛
胡爲向吳會雅意訪親串親串者誰歟昂昂金閨彥
噓枯由涵照要津藉推挽念子赴修塗發軔在昧旦
娟娟所嬌兒疑疑越門限閨人密縫裳遐征苦多綻
結束志千里二事忘一盼莫遣屢屢歌愆期發長嘆
宿歸元贈軾老

平生丘壑心祇園多幽趣杖藜過懸崖投足澄百慮

涓涓一滴泉湛湛三危露淵源自曹溪甘腴勝牛乳
諸峯羅孫曾一一尊鼻祖法筵碧眼人家世本鄠杜
紫樞與黃閣去天纔尺五不爲世網嬰桀可叶心素
繩牀作禪定太音響韶護應夢先補陀祝髮得玉斧
我來心眼明意氣諧律呂金地雨曼殊天香遶巾屨
明當整歸鞍天末蜚鴻度

奉贈正平上座

若人韻凝遠天資復敦龐蕭然出塵表幽寺聽逢逢
劍峯極天靜懸瀑聲春撞心猿久調御業白瑩明缸
殘河橫曉鉢霽霧起寒窗禪餘覓佳句鼎鼐筆能扛

我來孟冬月望履塵心降世紛劇羊負是身如帝江
願借三峽水一滋隴頭瀧永辦桑門服猶堪追老龐

和連雨獨飲

力田勝巧宦燕息自超然懶覲竹素書俯仰丘壑間
時時過祇園亦復舞胎仙偶然得歡趣舉觴望青天
六鑿自無競歛見象帝先羲皇隔晨炊坐見溟風還
磨螳不少留鼎鼎遂百年但得會心侶相對兩忘言
次秦處度贈歸宗老示中上座韻

夕霏催節往槁葉徑辭風力疾招秦叔望山扶老筇
泄雲爲卿靄牽余來鷺峯中有龐眉老常持半聖弓

一席跨牛地誅茅期此同虛懷包朗月意表得詩翁
遠志是小草慎在出處中公莫厭苦相歲晏長相從
嗣首座以老夫詩西嶺障斜日爲韻作五章見

寄次韻答之

尋春舍南北呼酒玉東西絕勝劉校尉太乙持青藜
天邊藝蘭人風光今幾畦胡爲寂滅海妙語紆虹霓
清霜熟柿栗會面一俄頃蕨拳漸紫苞鳥語度諸嶺
仰頭占昏中弧星光炳炳何當聽談玄令我發深省
我家二季子風標荀令上優孟何足求慎勿作楚相
毛顏獨摧顏兒能縛籬障摩挲繭栗姿我老那復壯

爭端起儒墨春蚓兼秋蛇筆研真淺事專門自名家
但有香積飯不妨薰毗耶溫風媚高柳招客整還斜
歐峯壓半天堦除轉晴日落磴多雪芽香草皆碧苾
嗣公釋門老耽耽虎而翼我欲往叩之藤蘿迷石室
再和嗣首座五詩寄舒老微老

在昔董仲舒屈身相膠西窮經著繁露窺園廢杖藜
而我異於是清晨來灌畦雨餘聊自適微吟看斷蛭
黃生牛醫兒襟量包萬頃稱譏等夢事緩帶耳不領
公議如丹青千載煥且炳古人何必遠薄躬吾屢省
堂堂一舒翁道價融壑上煙霞斷塵緣那復知苦相